


復宿山房集

卷二十七之
二十八



復宿山房集卷之二十七

山陰對南王家屏著

誌五

封中憲大夫前通州遊擊將軍崔公墓誌銘

翁諱經字邦濟號石溪其先頴上人國初有名程者
從

高皇帝征建昌有功授百夫長遣屯綏德衛尋徙榆
林邊崔氏乃著於榆林程生效忠效忠生整整生岩
岩戰清水營中賞率進爵一級至子林益累功拜副
千戶封武畧將軍則翁父也配淑人高氏是生翁翁

少嗜學於書無所不讀每恨以世廕故不獲自致然戎事少間卽涉簡編不置綽有儒將之風焉嘉靖間虜數盜塞諸將皆蓄縮務自完翁獨用敢深入力戰爲勇嘗提孤軍與單于大兵遇轉鬪六日水飲並絕士衆欲潰翁身被數創誓死毋相棄走衆乃益奮自堅會天大雨虜度不能得翁解去然自是憚翁威名矣已奉命守禦八角城虜皆齧指相誠不敢近八角邊曰彼有人焉未可犯也丁巳擢遼東都閫時歲大饑人相食翁請於所司言遼陽阻關爲固市糴不通二遇歲侵千米千錢道殣相屬今宜暫弛關禁聽轉

京東粟充入遼陽饑民宜可少紓所司用其言遼人賴以全活甚衆已未拜遊擊將軍開府通州通州近輦轂下軍吏盡市人子不知尺籍翁酌立科條部署勸懲咸有程度軍吏乃稍稍向方亡何念仲子中丞公且第諸子若孫亦彬彬立可付托遂引疾歸歸之明年而中丞公舉進士公輾然喜曰吾志畢矣因日與所厚善若田夫野叟相從於壺觴杖屨間人莫辨其爲故將軍也翁始以功封昭勇將軍中丞中旣第自理官徵入爲尚書郎歷雲中岢嵐并陘兵憲遂建鉞全晉勲業爛焉在策府而翁兩因其貴初晉階昭

武將軍輕車都尉再貶封中憲大夫蓋三錫命而兼文武之榮人謂翁雅好文恨不能自致卽自致奚以加矣寵祿方茂遽遘疾不起惜哉公性仁厚廉讓而有節始大父繼室楊無出宗人欲別塋之翁泣曰生侍大父巾櫛歿則棄之如大父神靈何楊竟得祔嘗值遺副飾於途舉以徵亡者家亟還之其事聞里中里中人皆以爲難自宗黨媼戚昏喪緩急周救備至或負責不能償則召其人焚券而遣之人以此益親附翁蒞戎事三十年首督府薦書者一撫臺薦書者三其他縉紳大夫傾慕誦說嘖嘖不容口歿之日

悲思吊輓者連數郡焉史氏某曰昔漢大將軍青至尊重三子皆侯而天下之賢士大夫毋稱焉隴西守廣以忠實心誠信於士大夫而功微數奇終其身歟封爵之賞彼固各有所不得兼也翁閱閱貴盛亡添大將軍而聲譽文雅視隴西不啻過之則加古名將一等矣世之怯夫懦帥見敵則走疇能冒白刃北嚮使士爭死其椎魯悛悛口不能道詞又安得審時畫便拯萬民於溝壑中要以翁之精忠偉畧得力於問學居多韜鈴詩禮之業烝烝萃於一門謂本之乎詒謀非耶翁生正德元年二月十三日卒萬曆戊寅六

月初十日壽七十有三配柳淑人壽官彪女生正德二年七月十八日卒嘉靖戊戌七月十七日得年三十有二繼王淑人義官景女子男四長鎮蚤卒娶文氏次鏞卽中丞公娶蘇氏封淑人次鑰實授百戶娶劉氏次銘娶文氏女一適百戶徐桂鎮鏞鑰俱柳出銘王出孫男十二養浩養性金綬德衛指揮僉事養志應襲舍人養愚衛學生次養正養大養直養恒養淳養清養淑養潛孫女五曾孫女三中丞公將以六年九月二十二日奉翁塋於廟兒梁之原與柳淑人合乃馳狀屬某爲銘某忝中丞公部中士諗知公家

世誼不獲辭銘曰頴上啟系豫章肇勲剖符錫爵國恩世賁六葉其昌猗翁濟美飾武以文敦詩說禮胡馬內閔憤彼憑陵提戈首路超乘先登一旅重圍兵矢垂竭輕身獨麀虜衆齧舌專城晉鄙分闔遼陽除關通糴歲饑不傷擁燾封圻軍容頓肅爲王瓜牙新士耳目疆圉旣靖丘園遄歸知足而止行樂不違於爍家聲增休闡奕式穀中丞作邦柱石載榮綸命馳恩益封因貴於子大亢厥宗後祿方綬倏矣其逝遠邇思悲惟德惟義鬱鬱松楸有新玄室淑媛從之厥德維匹我次其蹟勒之爲銘後世有述斯言足徵

封昭毅將軍錦衣衛指揮使李公暨配孫淑人
合葬墓誌銘

余以萬曆癸未典試武闈得今錦衣衛管衛事都指揮僉事李君光先哲而廣穎豐頤顧眄偉如也私心器之已詢知爲會寧高陽二伯後尚寶丞玠曾孫乃徵其文武傳世蓋有本云時都僉君父昭毅將軍歿已二紀葬西寧里中配孫淑人喪未祔也都僉君數爲余言父母異厝於人子心終不安則謀奉母喪西歸期昭毅公之窀而合窆焉久不獲請歲壬辰春二月援故事力請於

上許之將行持宮詹盛鳳岡公所爲狀過余乞銘余既習公家世不可辭按狀公諱崇文字輔國守村其別號也先世西寧衛人勝國時有諱南哥者仕爲西寧州同知值天兵定關輔率衆歸附

高皇帝嘉其誠授忠顯校尉命佐長興侯耿炳文經畧西平叙置規畫甚稱

上意已而撫安番部巴沙等施各受金牌符信納賚比內臣

上以爲能悉以西事委之又以收納罕東有功晉秩本衛世襲指揮僉事

文皇帝時督申藏等十三族進貢至京大被寵幸
二祖詔旨中皆呼南哥名語甚溫眷注若此南哥生
英英襲父秩隨駕出剿虜陷陣先登俘獲以數十萬
計擢都督同知先後受賚予亡算洪熙間率材官騎
士出崑崙塞逐虜以大捷聞俘名王桑兒失加等檻
送京師詔封會寧伯食祿千一百石給世襲誥券而
是時會寧猶子文亦以戰功起家封高陽伯討征西
前將軍印鎮守大同一姓二伯替組蟬聯西平人榮
之謂近世所未有歿而並祀世忠祠予贈諡焉會寧
之歿也子泉應繼封會妬功者抑而不予僅得襲指

揮同知然朝廷念其功不忘尋晉都指揮使已又以
捕盜功晉都督僉事右軍都督府管事景生玘登進
士第授中書歷官符臺丞蓋李氏之業自州倅以恭
順開先而會寧高陽以百戰勛伐益光大之至符丞
公更用儒術崛起制科爲天子待從臣於是李氏家
聲赫然雄五郡矣符丞公二子長寧襲錦衣衛指揮
使晉都督僉事是爲東村公次寘娶狄氏卽公父母
也公生而有英氣猿臂善射年幾冠喜遊獵從二三
節俠走馬長安道中酣歌慷慨睥睨一世時人莫測
也會東村歿亡嗣而公父蚤卒公卽承伯考秩爲錦

衣指揮使值虜內犯公躬帥健騎馳往逐之虜望風遁去人謂克其才氣得一當虜萬戶侯不足爲公願乃遭時承平武拙而無所用竟齎志以歿惜哉公雖驚於豪舉乎然與人交和易可親族黨幾二千人無長少賢愚待之咸有恩意飲食笑語懽然如一人里中人赴京師者肩摩踵屬於門欵接餉遺應酬不少厭其厚如此公元配孫氏錦衣衛都指揮錦女封淑人精女紅佐內政井井有條歲時輒西望拜拜輒泣下以不逮尊章爲憾一時譽功者並譽淑人稱賢配焉淑人先公卒繼支氏金吾衛指揮某女封太淑人

子男一卽光先孫淑人出娶劉氏寧晉伯斌女繼潘氏武驤衛指揮震女女二長適豹韜衛指揮王縉次適山東都司僉書署都指揮僉事谷子奇孫男一化龍娶許氏忠節公會孫女孫女一適錦衣衛千戶王遇公生嘉靖癸巳正月二十日卒庚申四月十七日得年二十有八孫淑人生嘉靖辛卯十二月十三日卒癸丑十一月二十日得年二十有三以某年月日合塋於西寧祖塋之次而都僉君又爲不佞道公庭訓時事甚嚴誦習稍懈輒怒而撻之或裁其飲食示誠孫淑人之疾革也囑公云兒生多佳徵宜督令成

立勿隳家聲奈我不及見矣公頷之今都會君以武科上第執金吾領禁衛

天子瓜牙腹心視之異日者乘時建豎以紹會寧高陽之烈其勲業詎可量哉李氏為有子矣乃為之銘銘曰謂將無種會寧之裔公材且勇謂材有用天生公材厥施未竟豈其數奇萬戶可封惜不遇時匪時則遘河清可俟而不永年雖拙於躬有子桓桓如虎如熊慶社方隆歸塋於宗傳美不窮

太學生米公暨配蕭氏韓氏合塋墓誌銘

隆慶丁卯冬予偕計北上過吾姨母門入辭焉姨母

方病臥則拜牀下姨母伏枕泣曰恐不及見汝歸矣

予亦泣相慰數語別明年戊辰予登第聞姨母尚能

詣予家問家人事意已瘳矣無何疾復作以己巳五

月初二日卒子祥等謀啟父葵菴公暨蕭母窀合塋

新阡則馳狀京邸乞予銘予持狀大哭憶母嚮者之

言果不及予歸以死也慟哉按狀葵菴公姓米氏諱

萬家字時給世為山陰人曾祖瓘舉宣德己酉鄉進

士任南戶部郎中遷永平太守祖福父太學生川母

王氏兄萬秉萬室次公次萬庭公少孤依伯兄為養

力學絕苦嘗持帙坐一榻所坐處榻為穿治春秋詰

以三傳了應如響甫弱冠與仲兄同廩於庠每試輒
居高第人以為盛嘉靖己亥貢於太學癸卯五月初
九日卒享年五十有一予為兒時嘗往來公家猶及
記公狀貌豐頤廣額哀然甚偉也先君為予言與公
為僚壻十餘年未見公有疾言忿色每飲輒盡醉或
羣狎公公岸然不為動其長厚如此又愛人喜施姻
友有急至傾囊振之不責其償嘗赴雲中邑人周某
患暴疾時更嚴眾逡逡莫敢出公冒禁為延醫治之
周得不死初配蕭鄉耆經女嘉靖戊子卒繼韓即吾
姨毋姨毋吾外祖壽官鈇第三女舅氏唐縣丞治之
妹也既歸米聞閨中人稱蕭賢乃諸事務從蕭撫蕭
所遺子女如已出蕭子即祥婦馬氏王氏女適臨洮
府經歷趙良弼皆姨毋嫁娶之葵菴公疾革顧姨毋
曰蕭子女吾無憾矣如此屬何蓋指禪裕暨二女也
姨毋泣曰吾不負蕭乃負君耶因自誓以明不二比
公卒屏去簪珥居常敝衣垢面媿媿操作以給諸子
女即尺帛粒米不忍妄費時祥雖長姨毋即不忍為
已子女私猶與祥共產業一歲間課農事豐約身自
總之不以累祥即所入雖錙銖亦無不示祥知者人
莫辨其為繼母焉禪裕俱嘗從予學稍媿則姨毋輒

鬱鬱廢飲食或訶責之曰吾知汝曹如是何若亟從
汝父地下也二子悚然裕天禪補邑庠弟子員娶劉
氏繼張氏女長適邑人宗妮次適代州陳祥璉孫女
二祥出孫男一禪出聘予弟生員家翰女外孫趙克
儒官趙克生員餘丞丞盛也嗟乎姨母嘗自言警敏
不及諸姨曰吾臨事訥訥不能一語至巽悞也乃今
孀居二十餘年撫遺孤振門戶凜然烈丈夫之節謂
巽悞者能之哉古鳩鳩愛子秉心如一栢舟守志矢
死靡它姨母殆近之矣是宜銘以俟采風者擇焉銘
曰孰所生孰所成孤爲重死爲輕良人無憾蕭以寧
歸與同兆諸所盟

封一品太夫人高母鍾氏墓誌銘

嘉隆之世館閣諸名賢秉清方之節而矜然不滓於
俗繫朝野重望者首稱吾師南宇先生高文端公云
顧微獨先生秉節茂也蓋亦有內德之助焉萬曆己
丑先生配封一品太夫人鍾卒於里第其子中書君
循學哀告於朝思命且下乃奉莫比部睿所爲狀屬
某誌而銘之某出先生門下習其家範誼不可辭按
狀太夫人姓鍾氏浙之仁和人也父曰拙峯翁潭母
冷媪鍾於仁和爲大族其先世隱田間不顯而德義

甚茂有善祥焉初青烏家過其先壠相之曰是丘也
法當鼎貴而耀自他無乃以女士與乎未幾太夫人
生而穎敏莊嚴八歲通孝經小學諸書兼精女紅翁
媪心奇之不輕字人時先生垂髫有雋譽父東園公
爲行言翁媪所翁媪心喜自負謂與相者語符欣然
許諾年及笄歸先生先生方衣逢衣治博士經而大
夫人拮据操作以佐之矻矻如也先生用嘉靖庚子
舉於鄉明年辛丑成進士上第簡讀東觀書使使迎
兩尊人而東園公意耽武林山水不至太夫人乃獨
奉姑徐來邸中晨昏上食惟謹癸卯先生拜翰林院
編脩姑徐思歸太夫人察知姑指力贊先生奉姑以
還還而東園公不欲先生久於家太夫人察知翁指
則又力贊先生治裝如京而身請留侍翁姑於室翁
聞之弗許曰婦不往令吾兒獨守官下誰與佐中饋
邪太夫人乃行丙午奉恩詔封孺人在官中得寸纒
束帛必以獻遺二尊人務安先生於公而先生孺慕
滋益篤戊申竟移疾歸與太夫人共承色養者二年
東園公復趣其還朝至則遇

皇祖爲

莊皇帝開朱邸置講僚詔推擇詞林碩望首先生命

甫下而聞東園公訃先生匍匐宵奔太夫人擗踊與俱以不及視翁疾躬親舍膳時泫然相對泣無已未幾姑徐亦疾太夫人不解髻而侍簀前者三閱月夜則露禱於天斬以身代而姑徐竟歿時先生以過毀不勝喪諸中外一切事皆倚辦太夫人大夫人代先生斟酌損益悉合禮經人謂卽先生躬自治奚殊矣先生素冠居里中四年而起始遷春坊中允管國子司業事再遷南京翰林院侍讀學士久之乃繇國子祭酒擢禮部侍郎改吏部兼學士陞禮部尚書太夫人皆從與襄內政焉而朝廷亦兩進太夫人號丙寅以少宰秩滿進淑人丁卯則以大宗伯奉恩詔進夫人云先生之爲大宗伯也會

肅

莊二皇帝鼎革之際不釐典禮延議逢蠱涌錯出咸取衷春曹旦暮待報先生考古憲經而酌時之所宜嘗草疏至丙夜不寐大夫人爲難脂火設茗具佐先生間詢先生所條議出一二語筴之奇中先生故善病不任勞已已以病乞休疏十二上乃得請加太子少保乘傳歸先是先生舊第災不復構歸而假館以居蕭然如儒生大夫人數尺奩具調劑其出入卽先生

不知其家所繇給也壬申今

皇帝出閣講學詔簡名德舊臣可備保傅者特起先生於家辭不允乃單車詣闕至則晉文淵閣大學士入參機筦甫踰月會

莊皇帝大漸召輔臣受顧命時先生已病疆趨侍玉几前還而抱烏號之悲病增劇遂不起太夫人哭幾絕已乃忍慟而經紀先生喪凡賜祭賜塋諸大事部使者及門必內取太夫人指行之所擘畫犁然允當蓋太夫人既稱未亡人而綜持家術彌務為勤儉凡上所賜金綺什襲燕之毫釐尺寸不忍費每誡子循

學而父入官三十年以清白自砥家無贏貲門無雜賓小子識之無忘所為兢兢紹先德者循學謹受命乙亥授中書舍人戊寅奉恩詔贈先生為光祿大夫大夫人為一品太夫人自先生卒十八年而太夫人卒卒時猶疊疊語循學而父在相位不义然朴忠正直矯焉以風節名世足垂不朽而當訓教後人令讀書守家訓無愧為文端公子孫吾目瞑矣語訖遂絕是為萬曆己丑六月二十一日也距生正德丁丑十一月十八日年七十有三狀又述太夫人賢不但高氏族宜之即鍾氏族亦無不宜之者其孝事拙峯翁

媪始終盡禮視其子勗季弟爲青衿弟子勉以力學
視其兄伯母吳及姑適張氏者金髮也所以饋遺收
卹之甚備其敦厚倫紀蓋一視先生而獨不喜隨俗
爲祈福施舍人有詭情飾說至其前者一見洞照顧
不肯顯言其過物有餘不足能坐筴貴賤而御臧獲
甚嚴卒不令逐時以取饒也其明達類如此舉子一
卽中書舍人循學娶通政馬君女封孺人女二長適
吳憲副子禮部員外郎果次適馬通政子國子生應
華孫男一自瀛早卒娶太守姚君女孫女一適余叅
政子郡學生士博曾孫一嗣文聘鄉進士王某女中

書君以某年月日祇奉恩命啟先生隧合塋於賜塋
余嘗觀呂文簡公所著先生誌未嘗不喟然嘆也當
嘉靖之季時政慘黷士爭驚於功利而先生數出數
引歸遡考其時太夫人寔同心一德有桓少君挽鹿
車之風焉可不謂賢哉比化瑟更張而先生大用人
方卜世以泰階之符藉令久於相位其燕婉箴規必
且有福邦家而澤函夏者奈何天不憖遺一老使太
夫人晚節十八年之間第爲發緯之私恤悲夫爲之
銘曰湖山之間陰陽所會伉儷象賢兆符鼎貴佐家
相國媿德均勞朝端稷卨女中禹皋典禮寅清演綸

密勿化瑟未張人琴遽沒後十八載啟帝賜阡隧而相見璧合珠聯百世流光九京不作理石羨門大書
閨媛

封一品太夫人王氏墓誌銘

一品王太夫人者故少師兼太子太師吏部尚書中極殿大學士張文毅公配也其稱太夫人以子貴加封故按狀諸王於河中爲望族有東泉公恩者配馮孺人而生夫人夫人生數月毋坳失恃乃育於大母張孺人所而東泉公客遊於外歲且久夫人不識也稍長始從家媪詢馮孺人時事及東泉公狀語輒泣

數行下比東泉公歸攬衣慟哭伏地不能起見者嗟異焉長而婉孌有慧性事大母唯謹大母絕憐愛之而季父東溪公有人倫鑒奇此女常欲予貴人以是偃蹇媒灼者數矣會朱邸中暴者使使強委禽東泉公猶豫莫決東溪公恚曰無嚴王孫而輕予女必郤之竟謝罷朱邸使者久之乃歸文毅公本東溪公意也夫人家故饒及歸張氏食貧乃目椎布操作至脫簪珥佐緩急無幾微見顏色文毅公重之癸丑文毅公登進士讀書中秘其冬夫人如京師乙卯以姑王夫人喪從公歸蒲坂戊午服闋從公如京師辛酉以

公編脩考績封孺人戊辰公官諭德以先皇帝建儲恩封宜人其冬公以省覲告從歸蒲坂是時東泉公歿且十年亡嗣喪未發也夫人歸而脩窀穸之事甚哀葬竣手植四栢於冢上曰是培塿者而誰主之乎此栢所以識也已又遷張孺人東溪公之兆改厝吉地而封樹之曰吾微大毋季父不及此忍忘厥恩聞者爲之感動明年春從公如京師辛未公官少宰以疾告復從歸蒲坂壬申公起家掌詹事府事復從京師其秋以今

上登極恩封淑人乙亥入相十一月以命婦入朝於慈寧宮明年正月入朝於慈慶宮各賜彩幣者四戊寅二月長秋始建入朝於仁智殿賜幣如兩宮踰月以公晉少保封一品夫人庚辰公以一品考績晉柱國少傅夫人封如前壬午公以遼左功晉兼官予世廕夫人封復如之癸未以封公喪復從公歸蒲坂蓋夫人與公出處相從敬相待如賓時燕婉進規益友莫及最後公首總機衡夙夜憂勞天下國耳忘家夫人之助居多初公爲編脩時嘗再迎封公於邸夫人所以事之謹甚朝夕執饋必躬自洗腆而後進之一錢寸縷不爲私藏出納必請於封公不請不敢發篋

復齋山房集 卷之三十一 十一
封公既歸公歲時遣人問起居上壽夫人必躬治橐
中裝務出其厚稱公意焉每傷王夫人無祿御食飲
必流涕久之若不勝哀者其孝德多類是乙酉公薨
夫人哭慟甚屢絕而蘇誠諸子治喪每用委巷禮比
葬乃徒步從之墓婦人之泣葬也必以輿鮮徒步從
者夫人喪舅姑及父與公凡徒步而從葬者四秉禮
若莊士人尤以是賢之戊子免公喪趣甲徵泰徵起
詣闕而謂定徵留待我諸子謹受命於是甲徵以職
方主事考績加夫人今封庚寅四月忽遘疾疾革盥
饋易服而逝寔是月八日也距生嘉靖壬辰七月三

十九日年五十有九甲徵等以卹典請詔特啟文毅
公之窆而合葬焉因命僉祭文毅公邊豆加等稱異
渥云夫人性莊嚴不妄笑語其勤儉慈愛植於天性
雖盛饌具供賓祭而饗殮無二簋不以鮮髓自給雖
好施予親黨貧不給者而身衣綈素自象服外無它
飾焉雖鞠諸子慈甚而所以誨之極嚴有過譙讓夏
楚不少貸雖馭羣下有恩而禁戢甚肅毋敢睚眦里
中者嗚呼是可以爲內則也已狀又言夫人幼時有
貴徵遇萬仙翁者見而奇之曰此女天下貴人也家
人心異其言乃夫人生而都一品拜七命秩等元臣

歿而宗伯致祭司空致葬用三公之禮禮之貴名蓋天下竟與萬仙翁之言符焉所生六男子甲徵考功主事泰徵精膳郎中定徵中書舍人久徵元徵國子生姻娶皆名家唯獻徵殤三女子一適武選郎中馬慥一字舉人楊煊一字舉人韓燿先卒孫男六賢輩輦質瑩鬻孫女五甲徵等將以辛卯二月二十二日奉夫人柩祔於文毅公之兆而劉石納壙中請余銘余嘗狀文毅公相業謂其有旋乾轉坤之功而本之誠心自然與溫國文正公相似尚未及文毅公刑家之化以方文正何如也乃今觀王夫人懿行無論溫

國夫人卽以人文正公所著家範中寧有異邪且溫國夫人賢而早逝不得相相業於元祐之朝而王夫人寔相文毅公秉大政與助其解弦調鼎之烈繇斯以談王夫人之德福視溫夫人不啻過之矣大都代間有名世之臣亦往往有名世之配彼其髻而著貴徵豈偶然哉余旣誌其事而系之以銘銘曰蒲文毅公今夔龍手扶日轂升天中坐令八表開昏濛刑家化國道所同衿輦治內何肅雍素絲緝衮輝山蟲金鼎大七鹽梅從鸞書屢進夫人封名齊五嶽班三公入朝長信虔儀容文綺珍純賜獨豐雲仍奕葉慶澤

復補山房集 卷之二十七 七
穠瑤瑜成列蘭爲叢神隨婺彩還太空佳城壁合蟠
雙虹黃河蜿蜒條山崇銘石與俱垂無窮

贈太淑人張母陳氏墓誌銘

張母陳太淑人者今東閣大學士新建公母也閣學
公自爲史官時與某同執經侍

上講幄兩人同有母同養於京而某不孝先妣竟卒
邸舍輦喪以歸至今慟焉閣學公及太淑人無恙奉
以還里歲餘

上召閣學公於家辭不至居二年太淑人卒卒二年
相麻下閣學公復力辭

上優詔不許乃以明年春襄太淑人厝事始應驛召
來蓋閣學公歸也以養太淑人其出以葬太淑人爲
子與爲母如此者可以兩無憾矣閣學公父曰賀仕
大官丞祖曰元春爲梧州太守金以閣學公貴贈通
議大夫禮部右侍郎兼翰林院侍讀學士梧州公與
陳方伯奎相友善而方伯子冠爲工部郎中郎中有
女少慧數歲能誦孝經烈女傳方伯公每出讌雖夜
分拱候以爲常方伯公憐而欲貴之見太守子有奇
表遂字焉年十八歸贈公人謂太淑人貴介宜不任
爲婦而太淑人婉孌有共德事江淑人與贈公所生

毋允淑人兩姑者各得其意在娣姒間居弱處後遽
遽如也於是梟內外咸稱少婦賢及江淑人喪贈公
伯仲析居久太淑人盡出奩中裝佐喪費而是時允
淑人亦已春秋高贈公遊南雍累舉不得志太淑人
從容說曰及親而仕三釜爲悅且孺子幸可教吾姑
以悅吾親於今日而待孺子於異日可乎贈公感其
言謁選授大官丞以歸太淑人與贈公朝夕事允淑
人盡驩歿而喪盡禮其課閣學公伯仲引經誼繩墨
訓督之甚備閣學公以戊午魁省闈戊辰成進士官
翰林迎毋於京壬申用今

皇帝登極恩封毋太孺人尋補經筵日講官用直道
忤故相江陵公意徙南京司業會大慶覃恩得封毋
太安人中遭排抑起符丞歷國子祭酒詹事掌院事
太淑人皆就養焉丙戌陞禮部侍郎教習庶吉士文
會典副總裁會典成贈祖若父如其官而太淑人晉
今封太淑人謂閣學公物忌多取主恩不易酬無亦
惟是進退禮義勉持末路無隕越爲

天子羞亦所以報也於是閣學公四上書稱疾乞歸
歸再踰年而太淑人卒於正寢其卒神色不少亂人
以爲定力之徵蓋太淑人雅好內典自贈公在時日

相與焚香誦黃庭金剛諸經輒有所悟入而以其爲女爲婦生長縉紳家更通達曉大義自閣學公侍經闡講讀開發當

上心數蒙賜賚則時時勉閣學公報稱閣學公所居傍長安道構爲似樓時奉太淑人登登而望見宮闕未嘗不歛衽肅容祝

聖天子萬壽也太淑人在閨閣中動以禮自律非姻族往來足不踰壺外春秋饋祀甚虔嘗勸閣學公置義田建祠堂以收族人尤好施予貧者予財病者予藥六畜非賓祭不殺羽毛螺蚌歲鬻百億縱之以爲

快嘗謂閣學公人須是存天地父母之心以是閣學公議論行事每依於仁克斯念也可使宇宙間無一民一物不得其所則太淑人之遺澤宏遠矣太淑人生正德甲戌六月二十六日距歿萬曆己丑六月二十日享年七十有六生子男三長位卽閣學公娶曹氏封淑人次佩光祿寺署丞娶孫氏繼朱氏次化上林苑監署丞娶余氏女二長適葉懋以歲貢任歸安教諭次適趙來亨與閣學同年進士任高郵知州孫男九大欽邑庠生大齡大夏大畀大興餘幼未名孫女十嫁字俱舊族余從閣學公石渠虎觀之間游交

復宿山房集卷之二十七
最厚稔太淑人賢其言動可著於內則至其勸贈公以仕而諭閣學公以歸盈虛進退之際皆與道合蓋太淑人晚而習靜一日呼閣學公曰予今乃不知有我不知有人此何也閣學公瞿然對曰此氣定也病且歿不改其度嗚呼豈惟進退且了生死矣銘曰處也而出大官有婦出也而處學士有母慧鏡外觀淨珠內守寶儉與慈用昌厥後在帝左右斟酌大斗澤被九有惟太淑人不朽

贈淑人劉母張氏墓誌銘

不佞在詞林善宮詹學士劉君君自守史官掌制誥

尋直講讀日侍

上左右數迎父淮安公母張安人里中安人時獨來萬曆己丑不佞起田間猶及啟居安人子舍無何報安人歸踰年而訃至宮詹君哭踊欲絕

上愍之特非時予誥命封淮安公通議大夫詹事府詹事翰林院侍讀學士而安人得贈淑人詔遣官諭祭營兆兆成宮詹君使使奉蕭宮允所爲狀來屬不佞以銘不佞雅習淑人懿行不敢辭按淑人姓張氏世家高平雙桂坊大父紀字振之父輔配尹媪以嘉靖丙戌十月十日生淑人淑人生而肌膚瑩然如水

晶可鑑振之公以爲奇會監司行縣館振之家相其宅謂當以女士顯於是振之公益重女不輕許人會淮安公以角非試有司文譽藉甚父封戶部公爲行言振之公重公名遂訢然予女以嘉靖壬寅歸公公家故貧伯叔並阡弛不視生業而姑陳安人操子婦特嚴諸子婦分受事爭趨簡佚而以煩劇遺淑人淑人婉婉受之無難色顧益務勤恪以先諸妣鷄三號業操杵提甕春汲聲相屬於堂下矣久之入室盡宜淑人稱其賢明年癸卯淮安公舉於鄉又三年丁未成進士拜中丘令中丘南北孔道公嘗戴星出入淑人內調其旨奉舅姑官中而外給公廚傳不時之需嘗手自織縑充費至今中丘人祠祀公稱有遺愛縑云治中丘二年值虜警需才急擢公戶部主事以淑人從績滿得封安人後從司餉昌平事竣當督運儀真直倭警需才又急特擢公守淮安公至郡軍書旁午常夜宿外舍繕城守不闕內室而淑人內政滋益脩公以是得專竟郡事無返顧焉明年倭大入舟蟻薄城下公躬提兵出擊入語淑人吾茲委身桴鼓間不復顧家矣若幸自愛淑人曰君能爲忠臣吾獨不能爲節婦耶因指闔盟此吾死所君行第勉之公出

淑人鐫門戶將一子一女徘徊庭中有關將軍像焚香祝曰神威靈震海寓而今賊夷狂逞寧不爲全淮百萬生靈垂佑耶因取玆卜之曰我兵勝則陽否則陰擲之得陽私喜而忽訛傳我兵失利一城盡哭淑人亟挽兩兒趨井傍伺變急將共墮俄馳報賊潰走城又解嚴乃投涕叩謝關將軍歸神佑焉公還爲言戰之日遠近望見髯將軍擐甲持戈躍馬貫陣而入賊披靡自相躡藉我師遂捷考其日正淑人卜玆之辰也事良奇矣兩臺上公功詔晉秩一級而相嚴夙銜公格弗予公不爲動治軍自若淑人諫曰君豈忘牴牾相嚴子事耶有功不錄讒且乘之盍解紱歸侍兩尊人成君志乎始公奉命監兌江西相嚴子多入居粟者金將有所託公拒弗應入語淑人以禍福觀所從違淑人正色對曰禍福有命與其徇私而倖福無寧奉公而罹禍耳公以此大重淑人至是淑人心度相嚴不但已因力贊公歸疏具且發而嚴相子果嗾訪僊王御史構公昌平事訐奏公被逮下獄淑人携子女間關數千里歸自淮上入伺翁姑顏色奉洗腆寬其憂退而具橐餽衣屨數遣使齎訊公京邸聞戶外履聲輒驚遽擁宮詹君出問北來音耗淚藪藪

滴兒頭顱也宮詹君泣思見父則復投涕慰兒無啼而父旦夕至矣已御史所奏公事勘無驗時方計吏竟用考功法中公罷歸公居恒悒悒自嘆以公正獲譴豈天道非耶淑人指宮詹君慰公曰天道非者安得有此兒乎公灑然意解宮詹君幼善病七歲猶未免於懷淑人祿抱掖持擘腕欲脫及能受書淮安公嘗丙夜起課兒讀淑人輒起與俱調護兒飲啖勞佚之節响响如也宮詹君以丁卯魁鄉薦讒十六歲淑人誡之曰兒尚勉學毋以一舉自多不見吾織乎累絲不已積而成匹藉令一幅而怠所就幾何比成進

士官翰林則又惓惓以歛英華守謙讓爲最以是宮詹君弱冠升朝文名駕宇內而冲然有以自下進而弼仔肩襄上理其器業殆未可量淑人寔訓成之間訓婦閨職必以身爲教曰無忘吾在中丘時宮詹君再校士禮闈淑人焚香祝天願得真才報國人簾之日戒恣肩鑰闈內外無敢通片言者顧語婦吾在司農署時如此今選舉重典豈特錢穀哉一日宮詹君侍

上日講退淑人曰若試爲我說經如

上前宮詹君爲布席陳書誦說其義淑人色喜曰是

不必文第明白易曉庶有開悟然又必積誠感動之不徒章句規勸間耳聞者謂斯言卽大人格心之學儒先生所不及也淑人故病衄血良已會聞季子病趣歸歸而季子弗起哭之慟遂感宿痾不治卒是爲萬曆庚寅十二月二十二日得年六十有五子男三長虞夔卽宮詹君婦郭氏累封安人虞龍縣學生婦秦氏虞皋卽先淑人卒者婦李氏繼孟氏女一適上黨太學士崔汝第以萬曆壬辰某月某日塋邑東南龍從山下負甲抱庚淑人孝事舅姑生養死塋歿思曲盡情禮伯叔蚤亡視其遺妾甚善伯婆不安其室遺二女淑人撫之如所生長而擇士族嫁焉姻黨緩急有謁於淑人及它貧無依饑啼寒號者靡不稱情周恤之俾得所欲乃已然不欲自爲德事必取淮安公指焉至其自奉盂飯豆蔬衣布衣數澣蚤興晏罷媿媿率作無勑容蓋卒之前七日猶疆起自製衣遺宮詹君於京也嗟乎詩書之言女德尚矣乃德音懿行各專一操靡得而兼焉淑人春汲脩婦道似鷄鳴織縑佐君子於官似葛覃宜於娣姒似桃夭以績訓子似公叔文伯之母至引義明節不以禍福死生怵心侃然烈丈夫之槩卽卷耳專一柏舟矢志何以加

蓋天寔釐之以昌劉氏宜其紛有此內美也宅相炳
其休徵神明孚其虔禱非偶然矣乃狀稱淑人視毋
家甚周父朝佐公年九十食一其脆必裹而餉之疾
革執手泣以不得逮其終爲憾兩弟賈而折閱爲脫
簪珥佐其資妹倩客死走使數千里與其櫬歸塋焉
繇斯以觀張氏藉淑人福澤不薄矣何獨昌劉氏哉
是宜銘銘曰有美淑媛冰雪其膚藐姑射仙作嬪哲
人成此宅相彼卜匪愆受事居勞提杵晨春爲諸奴
先受祿居約辟纊夜績佐君子廉勢摧如山仗公拒
私禍分所其寇迫於垣致節殉忠生也可捐金甲者
髯神兵下援在險得全鐵冠者讒蜚童橫彈遇坎輒
旋冥鴻翩翩鶴雛九苞何謂無天翱翔禁林文摛斧
藻士賴陶甄恪恭夙宵論思旃屢慈訓昭宣象服魚
軒考槃偕老子舍承懽恩聯二姓德施三族惠問如
川歿軫皇慈特頒優卹賜兆加邊寵從山下珠光玉
氣非霧非烟是爲淑人之阡

封淑人史毋安氏墓誌銘代

安淑人者大司馬史鹿野公配山東右方伯鶴峯公
毋也淑人卒方伯公自山東奔歸徒跣數千里哀毀
骨立亡何以淑人狀介京邸乞予銘予與方伯公同

復宿山房集 卷之二十七
年舉進士者誼不可辭按狀淑人之先蓋蔚州人始祖從

高皇帝取天下有功授明威將軍世爲涿鹿左衛指揮僉事父景母廖恭人淑人生而穎慧幼時善剪綺爲花雖所未見旋自手指中出能卽奇肖其組紉刺繡稱是獨不喜媒媢見兒女子嬉聚卽從其旁所行弗視也安公嘗謂廖曰吾視此女不凡必當配名貴人自是里中求者數輩咸不諧時大司馬方角卬已卽爲督學王浚川公所雅重名勃勃起矣乃栢菴公亦聞安氏女善則走灼約爲大司馬昏安遂喜諾尋

委禽焉淑人旣歸公卽日勸公績學夜則篝燈與對公乃以正德癸酉舉順天鄉試第一明年甲戌登進士選庶吉士淑人自爲新婦卽尚儉素及公貴愈自菲約雖尺帛寸蔬不以抵妄費曰寵賂之章繇家人好大耳奈何不自囊中節之而至取諸官以供其臍之資也太淑人寢疾淑人留侍床蓐者數年每需藥則藥輒具需茗饌則茗饌又輒具蓋亡頃刻去側繇是公得不以太淑人爲憂已公爲給事中疏奏大學士某忤旨逮獄衆嘖嘖危之淑人獨毋恐曰批逆觸諱自言官事寧欲畏罪自全哉未幾果詔釋公矣衆

高其識公繼轉光祿大理尋掌都御史臺大理與都御史皆風紀重地公每覆讞則淑人輒諭所具爰書狀從旁原一二語曰失人如錮失出如脫設令所鞫獄僅有一罅可憐而活之是自家造福也于公何人哉公用其言多所平反故事文臣命婦四品以上始得與朝賀淑人自司馬公爲大理已卽受四品封每入賀輒被寵賚若內則女訓等書及諸衣物甚渥也嘉靖初年皇后御西苑行親蠶禮一夫人列諸命婦前年老偃僂行忽失步幾跌內侍趨牽淑人衣進曰若儀貌精采當居前遂代跌者一時相顧榮之舉二子長值臣卽方伯公次獻臣國學生始淑人教二子學卽如相司馬公二子稍孀則曰女奈何媿女父焚膏達旦伊吾聲與機杼相應也方伯舉進士爲松江守擢山西憲副則又誡之曰刑凶器也女父爲理時持法若操刃恐恐然懼誤及人矣女能爲女父吾子也不能非吾子也方伯公唯唯嗟乎淑人可不謂有士行者哉言及廟堂宰相待罪而岸然處之不卹私昵禁闈深嚴之地則閨閣所未覩見一旦驟詣駒轉皇惑不知所置足矣而能以威儀棣棣自見於稠人中斯非所自持者定故哉持法三世不寬一夫雖慈

祥自天性而以陰德進說動援古人安可謂無所助也蓋不但爲名貴人配且爲名貴人母錫貶封膺耄壽光垂綸綍慶流後裔休哉栢菴公諱某登成化進士任河南僉憲太淑人姓王氏司馬公諱某淑人生弘治己酉五月初四日卒隆慶戊辰六月十六日子直臣娶張氏封安人繼吳氏次獻臣娶徐氏女二長適都指揮楊爵次適錦衣總旗郭芬孫男七孚先生員娶頓氏光先舉人娶陳氏德先錦衣衛百戶娶徐氏茂先娶焦氏繼楊氏恭先聘劉氏立先幼直臣出慶哥獻臣出孫女二長適翰林脩撰楊淪男次適同知尚世清男曾孫女三長適指揮馮効忠男次許太學生陳嘉禾男其一幼葬之日戊辰十一月十五日也爲之銘曰匪其多能孰匹厥文匪其多助孰相厥勳分虔主饋義知格君麟趾仁厚素絲清芬詒穀爾子於昭今聞貞志內注蘭儀外賁宮闈動色褒寵交殷洵百世其炳譽永妥靈於茲墳

封淑人王母周氏墓誌銘

周淑人者故少司馬總督陝西三邊軍務傅巖王公之配也淑人世爲代之振武衛人祖都閩公紀父義官公鈺母趙氏代俗右世胄將家子多與其流輩爲

昏姻率馱薄儒生弗予女乃義官公獨雅重儒生又私奇傳巖公才遂以淑人許焉淑人生十六歲而歸傳巖公歸十年而傳巖公舉於鄉又三年公登進士第起掖縣令徵入爲給諫歷刑科都給諫而淑人得受孺人封公自南太常少卿擢大中丞填撫寧夏而淑人進封恭人比遷兵部右侍郎兼都察院右僉都御史督陝西三邊以奏二品績進今封凡三命而至淑人淑人始歸傳巖公諸姒或以武人子易之乃淑人容止婉婉有則大不類武人子卽佐傳巖公學紡績呻佔嘗共一燭孳孳若故習儒生家者傳巖公旣

貴敷歷中外垂三十年所在屹然稱重至念勲業所繇則未嘗不歸其助於淑人也傳巖公在寧夏時疆事多從中制守臣惴惴不自保公以爲憂淑人慰之曰臣道取自盡爲義耳皇恤其它以是傳巖公得堅決行一意而有成勞卒亦不及於患比公罷督府還代以志業未究時時扼腕憂國事淑人爲言拙信固有數始君爲儒生時衆見謂遂遂局趣語以今日則有竊笑以爲懸而不可知耳乃今建纛秉鉞專制境外大將以下橐鞬而拜道左入謁則膝行蒲伏頭搶地豈不亦布衣之極乎夫能有今日者乃其能不有

今日者也又何憾焉公灑然爲解居三歲公卒淑人率二子爲公服喪如禮已二子僉以廕通籍京朝淑人則又從二子於京每訓二子居官奉職一如佐傳巖公時矣又天性純至方傳巖公爲奉常姑董太淑人以南土卑濕難其行淑人留侍能曲順董所欲當其心董疾則籲天請代董稱爲孝婦云傳巖公往與從兄弟析產割貲予之者數矣公卒而從兄弟之子數有言則淑人又數割貲予之終不與明其厚如此余惟世祿之家鮮克由禮矧處閨閣中習見純綺富貴態驕佚若性安從得禮教之言聞之淑人卽長於

世胄而佐傳巖公詩書之業卒顯其名令義官公成相攸之譽謂武人子能之乎大難大疑得淑人一言而決學士猶或以爲難其事姑稱孝睦於夫之兄弟稱和肅雝之範自梱內始可以風矣淑人生正德丁卯十月二十七日卒萬曆丁丑五月五日享年七十有一子二長峯以廕任順天府通判娶馬氏歲貢生翰如女次岸以廕任光祿寺典簿初娶吳氏少司馬南野公嘉會女先卒繼亢氏沔縣簿慶禧女女一適博興簿劉繩孫男二早殤孫女四俱幼通判君兄弟以今年戊寅三月三日啟傳巖公窆而奉淑人合焉

乃走使持趙侍御君允升所爲狀就余山中乞銘余不佞且臥病之日久惡能文姑據狀而次其事俾掩諸幽至傳巖公家世則載姚江胡太史誌中茲不具述銘曰周宗奕奕纓弁世承闡芬揚華淑媛乃生厥黨寔繁豈無良匹作嬪於儒兩美斯儷相在爾室肅肅離離國人化之二南同風勗哉夫子質有文武殫力宣猷爲國巖虎帝睠西顧曰予重臣內德兼茂二錫褒綸褒之維何勤敬檢飭以佐元戎詞核而直禴翟在室簪笄在堂食報旣厚垂裕寔昌生也有涯名則不朽我銘其藏託茲瓊玖

二十七卷終

復宿山房集卷之二十八

山陰對南王家屏著

誌六

封太恭人郝母李氏墓誌銘

故侍御溫泉先生郝公配太恭人李氏卒其子大叅君杰自山東徒跣窮日夜奔還號慟摧毀僅以其骨立吊者咸悲哀之居有頃屬其兄子鄉進士洲抱濟南文學巖君所爲狀就余山中問銘余不佞備在婚姻何敢辭按狀太恭人蔚望姓李氏女父庠早世侍母王媪凝重有儀不類凡女母常撫其背泣曰吾視

兒多貴徵異日必爲宜室婦第不知大誰之門耳乃爲慎擇所歸而會侍御公喪其元配王孺人以妣氏請遂許焉太恭人始歸侍御公而食貧則盡屏珍綺諸服玩不御日衣故敝衣額額操作夜則篝燈組紕佐侍御公讀伺公稍勸爲治茗具以進認認相慰勉侍御公得不以力學爲疲嘉靖乙酉侍御公舉於鄉筮仕衡水令尋調任丘用清直著聲則太恭人寔贊之其言曰居官欲守無以貨利薰心抗節欲高無以功名損志將安往而不得哉侍御公深重其言壬寅侍御公徵拜福建道御史時郭武定怙寵張甚公退

食列其不法狀將奏之太恭人請曰君治牘意豈在郭勛耶首領乂之疏上月餘不報侍御公每晨起待命則太恭人禱於室爲侍御公乞不死已而命下果止奪俸無它虞甲辰侍御公按滇南時大叅君兄弟業有俊譽太恭人外持戶內訓二子學相闕之間辨治若官府以是侍御公行萬里無返顧焉大叅君旣登進士由行人擢臺諫太恭人每誠之曰兒繼爾父居言路慎無忘爾父劾武定疏也後大叅君抗章論執政高公侃侃不避人言卽侍御公劾武定奚殊矣無何高公再當國頗脩宿憾人咸爲大叅君危太恭

人第屬大叅君解官歸曰丈夫志不合有卷身而退耳安能飾貌求容乎居歲餘高公報罷大叅君起爲陝西憲副請御太恭人以行不就大叅君旣轉山東則念太恭人耄矣謀上書陳終養事而太恭人又譙止之弗許也今年八月大叅君將入賀

聖旦將以便省太恭人於家未行而訃至其卒爲萬曆丁丑六月二十四日距生弘治丙辰二月二日春秋八十有三太恭人性至孝始逮事姑張孺人能曲意敬順姑疾爲侍湯液滫瀡之具無一不當姑心疾革則焚香籲天請以身代姑稱爲孝婦云冢嗣君本

爲諸生高等蚤卒太恭人偕冢婦字其孤而訓之孤旣舉進士而太恭人猶爲經紀其家不置也前後更天子貴凡三錫命而服御儉素無所改於食貧時宗黨媼戚雖至困辱遇之不加踈婚喪緩急有謁未嘗不各得其所欲卒之日白衣冠者以千數焉冢嗣君婦楊氏大叅君婦吳氏封恭人女三長適舍人白鎰次適甄紹祖先卒次適指揮胡璉孫男八蒲庠生洲癸酉舉人汾濂先卒洛洵俱庠生泮渙尚幼孫女四一適指揮章接一適生員王橙饒郡司理淳之子一適指揮祁光祖一許聘余子湛初曾孫二煊燧塋之

日爲十月十有九日其兆在東鄉之原與侍御君竈
合嗟乎世所稱賢父慈母直沾沾柔惠以啣沫爲濡
濕耳乃術法言引於正義惟名節爲兢兢億兆無一
焉太恭人相待御公父子以言顯至寵辱進退之際
不爲少怵雖烈丈夫何以加樹子以及孫芘且三世
而凝然若貞松勁柏志操愈明其所自持有越在倫
品之外者矣是宜銘銘曰彼君子女今尹姑作嬪莊
士稱良匹婦戒鷄鳴毋斷織言中國經動爲式臺諫
兩世邦司直風紀規隨如畫一有狐晝嗥鸛奮擊懲
憑其旁意不憎誰構毒者爲虺蜴從容包身無遽色
此室

封恭人劉母牛氏墓誌銘

劉恭人者封憲副松巖翁配大叅晉川君母也余與
大叅君稱同袍兄弟十七年於今數壽兩尊人於堂
兩尊人起居無歲不相聞也萬曆癸未秋大叅君以
轉漕如京私語余星二親今年金七袞幸道便還將
拜家慶於漳水上也余曰然則願附王生一觴大叅
君許之持以行行未數月走使奉恭人之諱抵余曰

星不孝延禍吾母爲家大人憂疾首痛心靡所控籲
敢句吾子一言用藉不朽余驚訊狀方大叅君歸奉
兩尊人膝下驩留不欲行恭人因以大義迫遣之去
則復遣孫用相慰之於淮上曰慎毋西顧念吾二人
吾二人無足念也其健自負如此乃倉猝旦莫間遂
不治迄無一語及家事云余受狀愴然悲悼念旣習
知恭人賢則不可辭恭人姓牛氏出沁水實庄父勤
毋陽城郭氏恭人生而聰慧端淑女紅內則不學而
能父母愛之爲擇配歸封翁翁時爲決曹掾給事邑
中或終歲不歸家四壁立恭人旦晚爲舅姑上食至

脫簪珥治餐具不仰掾橐一錢也比翁竣役歸挾少
貲游梁賈旣無贏而翁又特好義輕去財所得緣手
盡恭人從中拮据紡績治門內外事犁然咸辦復不
仰賈橐一錢也姑楊晚而病痿臥起飲食非人不力
恭人扶哺之於蓐間數年踰廁浣濯必躬親之姑嘗
語人吾所以延餘年以有婦故其孝卽吾女弗若也
於是里中咸稱恭人爲孝婦焉封翁性下急遇人寡
容而恭人時佐以柔婉家衆滋益和然訓子獨嚴初
大叅君受書外傳歸必課所誦習幾何譙讓不少貸
從子東啟少失恃恭人收而字之所以撫愛訓督一

復存身集 卷之三十一 四十一
如大叅君卒視其立爲邑知名弟子大叅君旣成進士自中秘官諫議用抗直敢言觸當路左遷蒲城意殊不平恭人慰之曰兒自以顛危身得從薄譴足矣豈應復懟耶時隆冬就道旅次薪火不屬恭人密誠家衆毋言寒言寒傷兒心已大叅君稍遷盧氏令人爲司徒郎尋轉河南僉憲浙江學憲所至輒迎恭人或就不就其在汝洛大叅君數苦過客往來厨傳煩百姓入而言狀恭人不勝顰蹙每誠內人毋恃奉稍而侈費侈費傷兒廉也始萬曆丁丑大叅君考司徒郎三載績得封松巖翁戶部員外郎母安人壬午以

皇子生上

兩宮徽號覃慶中外而翁恭人進今封恭人卽再受命禴翟爛然在御居常被縞着緼無異寒素家與鄰里處貴而彌降尤喜振人之急人或姑婦妯娌相望恭人出片言譬之渙然解矣故卒之日里中男女無長少咸爲盡哀其中心仁愛孚於人人也而恭人弟邑庠生志道又言恭人歸松巖翁也以父性喜酒常蓄嘉醞待之父過輒偕松巖翁酌爲壽每過必盡醉而後返父歿哀毀邁疾兩月然後甦則恭人不獨事姑爲孝婦卽爲女亦孝女也用能篤生令嗣服封

綽而垂榮名殆天所以厚其報歟恭人生正德甲戌
九月初七日卒萬曆甲申正月廿四日壽七十有一
子二長東星卽大叅君娶李氏封恭人次東銘娶王
氏女三長適庠生王體道次適王九府季適李給諫
子沾孫男四用相邑庠增廣生娶韓氏繼霍氏用康
娶郭氏用檢聘李氏用儁幼孫女三長適何署丞得
正子遵海次適王叅政淑陵子庠生洽季聘張祠部
之屏子洪猷曾孫女三幼以卒之歲四月十五日葬
於祖塋阮家坪之次銘曰佐廉掾佐廉賈良人以爲
輔爲孝婦爲孝女相內以爲矩安子於官安子於旅
終焉譽處堂上綸璽堂下繡斧歸休乎玄圃是爲晉
川君之母

封太恭人王母龔氏墓誌銘

巡撫其肅王中丞母龔太恭人卒塋有日矣中丞君
書抵不佞而屬之銘曰太恭人意也先是中丞備兵
上谷移岢嵐奉板輿而西道出山陰太恭人指敝廬
而問曰彼閭而額太史者誰也中丞以不佞對太恭
人喜曰固兒同年友乎於是中丞擬徵不佞文爲太
恭人壽旣奉諱因屬使爲銘嗟乎某卽不嫻於辭獨
柰何逆太恭人意哉按狀太恭人姓龔氏父攀世居

臨清徙太康母萬太恭人生十四年而歸贈翁稱副
室贈翁娶於蔡蔡故睢陽仕族也有婦德太恭人亦
婉孌自親媚於蔡得其驩贈翁爲諸生夜讀太恭人
爲篝燈設茗粥甚具贈翁好客客不時至從中索飲
膳飲膳又輒具蔡夫人以爲能雅敬重之數年夫人
卒遺一子一女皆仰太恭人太恭人撫之無異已出
贈翁視閫以內條貫井井儼若蔡夫人時意不欲更
娶太恭人固請再三乃繼室以李夫人李生女太恭
人亦始舉中丞抱持兩兒拜哺之劬勞並至蔡夫人
所遺一子一女者頗不得李驩時時督過之太恭人

委曲擁護事嘗得解又數年李卒太恭人始專內政
贈翁以明經貢太學謁選得相雲不色喜太恭人慰
之曰官豈有崇卑各欲自効耳誠潔已愛民卽名卿
何以加贈翁治縉雲用惠政得民去而見思太恭人
寔助之滿三載績贈翁忽病瘧幾殆小間太恭人婉
言請吾汝薄游數千里外無壯子在側獨一稚子從
緩急不足恃盍歸乎贈翁曰吾志也遂投牒還還而
橐中纔數金值伯子垞餼學宮爲具行脩費輒盡比
爲所哺女治奩具則拜太恭人簪珥俱盡矣贈翁得
兩兒晚愛之甚太恭人獨佐之嚴歸必問所就業出

則微伺所與遊者何人稍縱輒譙訶不少貸兩君同就省試太恭人必祝天願伯子先及中丞君成進士蹇然曰堦竟先堦乎天柰何不報蔡夫人伯子四十未有嗣太恭人爲置妾媵所以調護之甚周卽就養中丞宦邸數年於外每飯意未嘗不在伯子及所哺女也中丞君筮在滋陽令有所論報或鞭笞聲聞於內輒輟食而嘆諭令從寬比徵入爲給諫首疏劾大璫或言大璫且反釐者太恭人從容謂曰忠諫自兒職分他更何恤尋出中丞君叅楚藩諸寮友過而相慰太恭人從屏間聞其語退語中丞君兒起家不數

年至藩臣客猶謂薄耶是時太恭人用合

上登極恩業受孺人封比中丞奏叅議滿績而晉封太夫人中丞君由岢嵐擢都御史撫甘肅有詔趣行中丞君意不能離毋太恭人曰兒受國重寄稱疆場臣義不得復顧其私我家居而視諸婦諸孫亦自愉快也中丞君單車赴鎮旣受事於戎務倥偬中數慮太恭人啟居則謀上書而乞養太恭人聞而弗善也馳使止之中丞君乃不敢復言歸而太恭人遽卒太恭人孝敬慈儉出於天性每遇舅姑忌辰或節序薦饗哀容可掬朔望一御蔬素晨起焚香肅拜以爲常

贈翁歿三十年嚴正之操有古烈女風子若孫定省於闈中卽盛暑未嘗見其袒露米鹽七箸嘗手自經紀不稱勞居平粒米寸絲不忍妄費衣被或數澣弗更而特好施予內外姻族有求太恭人者人人得所欲去卒之日遠近赴吊咸爲盡哀

天子使使者諭祭焉史氏某曰婦人助道承嫡與夫難兩當也而已之子與嫡之子難兼愛也太恭人侍贈翁更兩夫人兩夫人之性行有間矣而太恭人始終克諧溫惠若一其愛兩夫人之子不異中丞君其老也能違中丞君而不能違兩夫人之子殆慈仁隱

惻誠結於一不可解也蓋中丞君宦蹟多在秦代間秦代之人親附中丞君不異慈母循其行事有以也哉太恭人生於正德癸酉七月廿六日以萬曆十一年四月十五日卒壽七十有一長子埏歲貢生先卒婦郭氏長女適壽官韓月桂金蔡夫人出次子埏卽中丞君婦李氏累封恭人次女適省祭郭尚寶卽太恭人所哺李夫人女也孫男二錫第生員蚤卒娶劉氏殉夫奉詔旌節錫卣生員娶劉氏孫女八一適生員劉汝連一適劉汝愛一適李宗堯一未聘長君出一適生員師準望一適賈漢招一適劉養白一未聘

中丞君出曾孫一汝嘉曾孫女一未聘以萬曆十一年十一月二十四日合塋於贈翁之兆禮也銘曰何鼎何參燕處訢訢何桑何榛鳩愛惟均言不踰垠禋國益民子順婦貞化浹乎人倫銘之無文鏡諸佳珉傳千禩其弗湮

封恭人蕭氏墓誌銘

憲大夫完菴王公之卒也大中丞三山溫公寔銘之後十五年而配蕭恭人卒子德安司理君淳介書使某曰徃天禍孤奪先大夫辱三山先生之銘也而藉以不朽茲又奪吾母以不肖辱知於吾子儻微一言

之惠先恭人亦且不朽某曰唯唯夫三山公鄉先生有道者也其言宜足重某至謏陋卽有言何敢望溫先生雖然若恭人賢則習之矣恭人父璉蔚州衛勳裔母殷氏恭人生而嚴重不妄言笑年十八歸憲副公公贈南北部郎仲子家世農也母吉太宜人常率伯子夫婦居田間理畊饟公獨抗志治博士業恭人入則奉几案佐公讀出則操井臼佐姑妣作勞閭以內若得兩新婦之助焉正德己卯憲副公舉於鄉又十年而仕由大理司務轉南北部郎更兩省法官每當論讞恭人輒從旁設悲憐之詞以感動公以是公

亭平疑獄一依於仁恕民用不寃已亥值大報覃慶
拜宜人封明年子淳領鄉薦甲辰憲副公陞貴州黎
平守黎平古牂牁郡去家萬里溪峒諸蠻矯虔易動
人多危之恭人謂公此莫非王土君素以忠義自許
寧憚遠耶遂與俱往居五年用奏最恩晉封恭人癸
丑遷公貴州按察司副使飭戎普定去黎平更遠矣
而恭人從之愈益坦然無一語及家園事以是能安
公於官丙辰公奉詔致仕計恭人從宦中外二十餘
年而簪珥服御一無所益於舊歸而與憲副公偕老
林泉之下泊如也始姑吉太宜人卒姒武寔持家秉

恭人所以事之一如太宜人憲副公上春官也有司
爲制勸駕續食之費間蓄其贏悉納筦鑰於武卽緡
錢寸縷不以入私室武卒遺孤潤恭人拊之無異已
子每之官必携與俱潤死則復收潤子女拊之曰是
其大母與吾共釜鬻甘苦同之者也嘗爲憲副公置
黃氏姬黃卒遺一女恭人自子之嫁爲治奩具甚厚
人尤以爲難遇姻族煦嫗有恩無擇貧富視襁褓顛
顛者或反益親諸婢時有難色恭人叱之曰其人雖
貧吾親也親豈以貧故損耶其厚如此司理君數詣
公車以不能去恭人殊無意仕恭人趣之曰兒以祿

養為薄宦遊為遠而父非耶強使謁選得江西饒州
 府推官已調湖廣德安道家奉觴恭人甚驩也復次
 且不欲行恭人則復趣之乃行抵德安二年而恭人
 卒萬曆九年正月廿日也距生弘治九年十月二十
 三日享年八十有六子一即司理君淳配楊氏女二
 長適新城司訓嚴汝泰次適庠生馬淪俱先恭人卒
 孫男三楊庠生娶李氏指揮綱孫女橙庠生娶郝氏
 侍御溫泉公孫女一幼孫女二一適孫鸞一許聘李
 檢曾孫三曾孫女四以萬曆九年十月初七日啟憲
 副公窳合焉某惟閩教之失父矣貴家子以結縭入

室即侈然驕其失輕佻不事事時睥睨諸姒不啻庸
 奴遇之少有違言則日夜搆於室求析箸幸以其夫
 立德色滋甚何但金多足詫而已乃恭人以婉變新
 婦佐下帷之業時可以佚而務折節下冢姒分其勞
 憲副公既貴分可以專顧猶逡逡奉筮鑰唯謹安其
 卑敦睦之懿延及於子若孫無少間近代所未有也
 用能以廉貞之操懲通憲副公萬里外歷險遠而不
 警甘澹泊而無悔豈非明倫誼毅然負丈夫之槩者
 哉可以銘矣銘曰卓被髦士奮跡於田恭人相之殖
 學彌堅孰謂治生不如伯力乃有恭人晝饜夜績孰

謂所就不如仲多姒也持鑰寧計誰何萬里滇陽嶮
巖汗漫載輔其行義不避難珠璣瑋瑁滇產稱饒歸
而垂橐故業蕭蕭有穆閨儀孰宣其曜帝制焜煌炳
焉臨照遺休餘慶孰闡其芳惠文執法後祿方將史
譔其銘合符於隧考德徵詞庶幾無愧

封恭人吳氏墓誌銘

吳恭人者大司徒少泉郝公配也司徒公清忠端亮
卓有古大臣之風而恭人壺儀雍肅寔儷德焉曩余
入仕司徒公業爲名御史其後歷官藩臬所至有聲
然率單車往恭人未之從也旣遷中丞撫遼恭人始

一往往則邁疾而還侵尋綿滯遂以不起司徒公悲
之爲卜兆城東二十里辛庄之原東河之干將以八
月十九日塋焉則介其甥鄉進士胡生世廕所爲狀
就余山中徵銘余忝託姻末誼不可辭按狀恭人姓
吳氏父霖蔚州衛指揮僉事母余氏恭人生而莊靚
寡言笑笄年歸司徒公時舅侍御溫泉先生予告里
居簡重有家法而姑李太恭人性特嚴子婦有過不
難面詰恭人小心抑畏旦夕上食必躬致味而後敢
進舅姑加餐則已不則慄然懼曰得無不適口乎用
能曲當舅姑之意得其驩司徒公少有雋望敏記誦

恭人每然膏組紉以襄其勤稍輟輒規之曰舅姑祝君成名若種之待穫焉不殖將落能無惕乎司徒用感勵文譽日起壬子以禮經魁於鄉丙辰成進士筮仕行人俸入甚薄而溫泉公又廉宦乏贏金也恭人則不難脫簪珥充僕馬之費矣辛酉司徒公擢拜監察御史癸亥奉命按貴陽以二親屬恭人恭人所以事之滋益謹溫泉先生病恭人爲營醫藥治之百方夕則秉燭候伺寢門外或丙夜不去姑憐而勞之曰婦可以少休矣恭人泣曰子勞王事而不遑將父婦懼不能任緩急敢卽安乎蓋溫泉先生歿而司徒公

自數千里外來奔凡舍襚棺衾無一不如其所自盡也服闋復除河南道資當內轉而以抗直忤權貴人意移疾歸無何補陝西憲副公論誥之恭人特趣公之任而身自留侍太恭人太恭人病恭人侍之一如溫泉先生乃扶掖床蓐間滌濯廁踰急則拜斗籲天斬以身代懇惻有加焉太恭人疾革握其手語所親曰自吾爲未亡人一綫游息延之十餘年非孝婦不及此吾無以報孝婦者語畢泣數行下所親咸爲感涕於是里中嘖嘖稱恭人孝婦矣至與伯姒及諸姑處相得懽甚無異同胞長姑喪明一味之甘必以分

饋四時之衣察其寒燠致之終老不厭也鄉鄰姻族雖至卑微遇之必與均禮其孤嫠貧窶不能自存者各稱其有無調恤之人人得所欲焉乃自奉則澣衣綦巾泊然冲素自爲宦家婦四十載曾未見其施珠翠御錦綺者卽檢之篋笥亦無有也尤晰於大義當司徒公忤權貴人受抑不無介焉於中恭人慰之曰君言官也以言舉職既舉矣遑恤乎他已丑公建鉞遼陽時虜患孔殷赤白囊交錯於道公周爰經畫分授諸將機宜劬勩不遑暇食恭人憂之每從旁問所爲計公食乃食公寢乃寢公當提師出則寬之曰

疆事至重君特顯精行間無須內顧然公出而恭人怔怔怳怳憂悸金作疾端萌矣壬辰公入筦戎政尋拜大司徒方受上眷倚而恭人獨時時泣勸公曰名盛則忌位高則危此殆君知止時也公曰吾念此熟矣因屢疏乞骸以歸嗟乎古今哲婦克踐閨彛者有之若識達官常憂存國事休盈滿之戒灼去就之幾此在學士大夫猶然牽溺不能決乃恭人目不涉圖史跡不踰房帷引義陳規闡合大道豈尋常笄黛之倫可同日語哉始司徒公居臺中考三載績而恭人得封孺人制詞有孝敬惠慈穆宣壺政之語及任憲

副值

今上登極恩而恭人晉今封則又褒之曰操其儉素以介廉勤宸綸煌煌足稱實錄徵微考懿永世且有辭焉尚奚俟余銘恭人生嘉靖辛卯七月七日卒萬曆丁酉正月六日壽六十有七生子四人長季蚤亡仲子洛圖恩廕太學生娶徐氏淑子洛書娶董氏繼鄒氏董氏女四人長適京營叅戎章接次適山西副將祁光祖次蚤卒次許聘余子湛初未婚亦卒孫男一孫女一適寬奠副將馬棟之子炳銘曰詹彼衮司台光陸離助宣者誰厥有女士儀髦齊體無違夫子晨筐摘蔬春盤薦魚佐饋惟劬謂學猶殖滋培勿息佐勤夜績仕貧且淹簪珥可捐脫以佐廉孝佐吧岵生侍七箸歿襄榻樹貴而彌冲嗇以居豐履盛戒盈偕歸衡宇鴻冥鳳舉忽遺其侶埋璧於山沉珠於淵晶熒屬天銘詞質直勒之貞石聊誌窀穸妥靈玄宮佳氣鬱鍾發祥無窮

封恭人靳氏墓誌銘

余同年友上黨玉溪暴君叅秦藩一歲而配靳恭人卒則爲走使持大中丞七泉先生所爲狀抵余曰奇不穀逮罰室子室子歸奇四十年矣凡奇之學攻苦

仕盡瘁室子寔拮据質之奇不忍沒其勞弗著敢累
吾子以銘余誦書惻然悲其意而七泉先生言又足
徵也乃不辭而志之恭人與潘叅君同為屯留人父
鈞主直隸懷遠縣尉母李恭人生而端重不妄言笑
將出戶視帚前後襜整乃行懷遠公以為有貴徵當
婚士族邑富人行灼數輩弗許也潘叅君時為弟子
員有聲以灼來欣然許之宗人竊言暴生貧奈何予
女懷遠公曰是非若輩所知竟以恭人予潘叅君潘
叅君家世農也父贈潘叅公母王太恭人暨兄嫂並
鄉居而潘叅君以從學故獨就邑中所親厚故人家

寄食當受室始別儻一舍舍乃負郭窮巷僅僅數椽
恭人入舍中守一釜一甌躬執爨以餉潘叅君不見
為貧翁姑以事入城倉卒上食必委曲致鮮髓以進
舅姑甘之以為適口歲時製衣履以獻舅姑着之以
為適體每稱曰吾孝婦孝婦云恭人間省舅姑於鄉
舅姑亦輒為具餉恭人貴愛異於諸婦諸婦初不能
無望及見恭人折節下之始稍稍解潘叅君用諸生
高等掄入河汾書院講業已襄垣紫巖先生聞其名
延為其子弟塾師三年不返恭人從閨中操女紅紡
紝上奉舅姑下治子女婚媾一不以關潘叅君分其

心蓋藩叅君歸閱室中之藏得絹布二笥局鏘甚固發之則恭人三歲所蓄也於是藩叅君嘆曰嗟乎吾乃今知吾妻以吾治生所蓄孰與吾妻多吾妻賢妻也藩叅君屢試省闈不利嘗鬱邑不自得恭人慰曰功名遲速有命君憂不學豈憂不遇哉藩叅君感其言績學愈力遂以嘉靖甲子舉禮經第一人明年連舉進士會贈翁暨太恭人相繼物恭人相藩叅君襄事如禮既殯猶晨夕哭奠其位以爲常已已藩叅君除服入京受戶部主事踰年改河南道御史見稱廉直而恭人更佐以節嗇度奉人制費卽尺紈寸珥無所芬華藩叅君持斧再按部恭人課二子讀必稱藩叅君曰無墮乃父志也藩叅君守衛輝以二子從歲值大比當遣就試仲子逡巡不欲行恭人目攝之曰兒不及蚤自試讀書欲何爲乎且而兄行兒安得獨止於是二子偕試並列高等而仲子適以是歲餼學宮恭人喜曰兒幾失餼乃以毋命得之其訓子有方類如此始恭人長女適路京兆子蚤折恭人日夜哭過瘁滯床蓐者十餘年竟坐是不起以今年六月十七日卒距生嘉靖癸未十一月廿九日得年六十有一子二所學娶李氏僉憲之茂女所養娶董氏儀賓

某女俱廩生女二一適國子生路承賜京兆王道子
 先卒一適庠生龐敏遇大尹鳳鳴子孫男三忠貞娶
 段氏謙貞娶陳氏安貞幼孫女一許聘庠生申應宣
 子以是年月日葬東堰新阡史氏某曰世稱桓少君
 之賢豈非以其能斥容飭安貧士乎恭人歸藩叅君
 而食貧宛然提甕之節乃黽勉有無勤生訓子抑又
 過之然少君食報三世而恭人一再拜封遽歿不及
 終贊藩叅君大業此藩叅君所為追悼其平生而悲
 也銘曰鳳和鳴兮匪卜嬪寒士兮白屋躬綦縞兮周
 旋歷諸艱兮捋蓄相素絲兮藩維佐義方兮家塾舊
 封制兮孔殷悼脩齡兮易蹙闕高丘兮卽安勒貞珉
 兮志淑

封安人孫母蔡氏墓誌銘

蔡安人者解梁孫孝子公婦封吏部文選司主事對
 岡翁配考功副郎維清母也副郎君舉嘉靖乙丑進
 士授中書舍人業封母孺人無何以清望擢吏部主
 事會今

上御極而覃恩乃又進封母安人也安人始從副郎
 君京邸居二歲歸歸一歲邁疾副郎君忽心動趣謁
 告還安人目攝副郎君意不欲其解官來為疆起御

復宿山房集 卷之二十一 三十五
飲食示無恙久之病良已值歲當計吏冢宰奏起副
郎君署考功事副郎君低回不欲行安人作色曰兒
以我故解官而慢

天子之徵命豈以我數病當不復起耶夫人之有死
等死耳奚必死於子爲死也副郎君乃行行如京不
數月而安人之訃至副郎君日夜伏地哭幾絕乃持
其姻友趙戶部君所爲狀過余泣而言曰傷哉清不
得侍吾母之終而眡其含歛也何以道死誠徼惠於
子可爲吾母計不朽清死且不恨子其圖之矣余與
副郎君偕舉於鄉習知安人賢誼不可辭按狀安人

生而柔慧少從父寶坻司訓公秉禮授孝經列女傳
讀之自是言動周慎壹軌於禮度儼然儒生司訓公
奇之爲擇可昏者以敦行無如孝子公家遂許昏其
子禮是爲對岡翁孝子公諱孝早孤事繼母李服勤
百方無所失卒驩其心太史呂涇野先生倅解表其
閭曰孝行以是人稱之爲孝子公孝子公配孺人張
生四子皆出分獨對岡翁侍安人始入室尚逮事繼
祖姑李也孝子公朝夕率子婦奉李起居凡李所欲
言有不可以示孝子及對岡翁者悉以示安人卽孝
子及對岡翁所不能得於李者安人婉婉居間申慰

一二語李灑然當意也而姑張孺人者性更嚴居常操子婦廩廩多所督過顧特宜安人姑病安人宵衣侍臥起常淡旬月不少怠下至踰廁浣濯必躬執之不以有諸妣爲解姑病且篤安人焚香拜北斗祈以身代歿則時時哭視諸妣特哀焉孝子公晚而喪明對岡翁日延醫理七劑安人從中出飲食具佐之至脫簪珥無難色孝子公旣卒遺繼姑李安人又輒曲意奉之一如侍繼祖姑李暨姑張孺人也其孝如此余惟婦道之薄久矣箕帚耨耜且不能無勃谿於室而安人委蛇敬順周旋房闈間更事三姑而不渝卒

成孝子公與對岡翁之志世濟順德槩之士行猶或以爲難蓋安人旣自有婦每誠之曰吾曩事舅姑祖舅姑至勤苦矣要以善承其意不值在甘毳間也斯可以觀安人已而狀又載安人相對岡翁勤生訓子績學撫幼少振窮乏諸懿行甚備茲不具論論其孝語云一孝立而萬善從之信然哉安人生正德己巳十二月十八日卒萬曆丙子五月十九日壽六十有八子男二長維明州庠廩膳生先卒娶張氏次卽副郎君娶李氏封安人側室張氏女四長適庠生馬騏次適太僕寺少卿侯居坤次適鄉進士劉志仁次適

庠生李瓊孫男三懋德聘戶部主事李春光女懋謙懋學俱副郎君出女孫四人一適庠生馬蛟子逢樂早卒一適兵部主事李瑱子庠生希栝一聘戶部主政趙欽湯子楷俱維明出而副郎君字之一副郎君出尚幼副郎君爲安人卜宅得兆條山之麓澗水之陽以萬曆六年三月十九日奉安人柩厝焉遂勒余言於石而掩諸幽銘曰奕奕孫氏以孝用譽史旌其閭非獨士也爰有婦順史銘其墟史氏旌之史氏銘之厥詞匪諛

封太宜人孫母趙氏墓誌銘

往余奉先淑人喪歸也時大叅麓陽孫君備兵雲中以余同年友又部下士辱臨吊焉其明年推

上卹恩檄有司爲先人起家役甫集而會虜酋嗣封公提兵監塞上於白登道中奉母太宜人諱徒跣歸矣歸而以不及躬訣太宜人慟甚乃馳一介抱地官大天崔君應麒所爲狀就余問銘余儼然衰經中非喪事不言烏能文顧念大叅君之痛太宜人與余之痛先淑人情非有兩也余非礱石而爲先淑人圖不朽忍違大叅君意乎按狀太宜人者前沂水令贈奉政大夫廬州府貳守鳳岡公配也鳳岡公之歿蒲少

師張文毅公寔誌之茲不具述述太宜人
事太宜人姓趙氏世爲獲鹿望族父司權公某配馬氏生太宜人
人太宜人人生而婉靜有令儀司權公奇之曰是女必
貴毋予庸人而適典膳公謙爲沂水公擇配聞趙女
賢曰是吾家婦也遂委禽焉年十七歸沂水公猶逮
事王舅姑太宜人入室則隨姑蕭孺人奉王舅姑而
又自奉其舅姑周旋重闈閭以內若得兩婦之力焉
蕭孺人性嚴操下凜凜諸婦鮮當意者太宜人獨委
蛇奉順得其驩沂水公家故饒凡農圃孳畜米鹽絲
枲稟計受算者雜運戶庭更僕不能讐而太宜人以

一身從中綱紀其務夙興晏息日媿媿督課以爲常
後兩姒相繼入姑念季婦與苦甚休矣終不以其故
斲分勞也迨姑老而太宜人業有子及婦乃侍姑愈
益恭倉卒上堂非具巾幘飾鞶輓固不敢見見而立
終日不敢欠伸跛倚及有噦噫嚏咳之聲晨昏率諸
婦起居寢門伺姑所欲嘗先意儲具以待如此者蓋
四十年猶一日也沂水公少力學讀書山寺恃太宜
人持壺內得無返顧比貢入成均謁選沂水令尋改
潞安郡博服官累年而倚太宜人於家拮据俯仰曾
不責官橐一錢以是沂水公得安其廉沂水公性隄

直寡合太宜人時勸以冲和沂水公自度不能也竟
偃蹇罷歸翛然山水間顧謂太宜人第若爾言冲和
而適官能恬愉如今日乎太宜人曰恬愉之境正非
冲和者不能適耳沂水公益喜自快育大叅君兄弟
慈而不暱生而衣以布衣飲之脫粟俾知惜福長則
爲延師講業令名以才占一藝而時訓飭之期於有
成以是諸子爭自淬勵用文武科名顯則不獨沂水
公之教也大叅君旣貴以佐郡滿績奏最而拜恩得
贈沂水公如其官而太宜人有令封崔衣鼎食奉養
滋腆乃居常曳編啖素無少芬華曰吾自安此不薄

矣其儉如此晚而康疆善飮齒髮步履不減盛年比
從大叅君於雲中春秋八十有四矣其歲一日而舉
二子太宜人裸抱而手摩之驩甚以屬大叅君曰兩
兒家瑞也宜善撫之願吾不及見矣居無何歸里歸
而病脾乍愈乍作竟不起時丁亥七月十日也距生
弘治某年十月二十二日享年八十有六以是歲月
日啟沂水公竈祔焉子男四長應龍次從龍俱冠帶
武舉應龍娶姜氏從龍娶高氏次攀龍娶高氏繼王
氏次化龍卽大叅君娶崔氏封宜人女二長適庠生
周九思次適知印王無私先卒孫男十二脩業纘業

廣業應龍出衍業永業從龍出新業敬業居業攀龍
出振業持業新業俱庠生孫女十四人壻庠生高嘉
賓高嘉樂高喜言楊國柱曹時明武生胡蛟傳訓高
嘉瑞王嘉楨田世祥蔡如陵其一許娉崔郎中子卽
前所稱地官大夫應麒者也一許娉庠生郭勝之子
餘幼曾孫男九斯繁斯秀斯美斯盛斯貴斯才斯遠
真七重九曾孫女七當隆慶戊辰同榜舉進士者在
獲鹿有二人焉一大叅君一寧波守高君自新也初
但謂兩君同邑耳已乃知兩君毋並出趙氏爲同產
兄弟則相與嘆趙氏鍾美宅相若二甥必非凡族矣
以今觀於太宜人子姓蘭叢玉立斌斌質有文武所
以張大孫氏者尚未可涯而寧波君子弟復多聯姻
孫氏稱世好兩家羔鴈賁相望里中而趙氏滋益顯
重非盛德孰能當此者乎及稱大叅君婦一乳二子
並吉祥善事可異語云天道無親惟與善人嘻豈皆
偶然之故哉銘曰疇謂姑也嚴諧于而室終老沾沾
疇謂士也恬昌于而嗣慶祚炎炎福并壽兼生榮歿
安歸祔乎奇山之南銘百世其弗劓

壽官王公暨配孺人郭氏戎氏合塋墓誌銘

吾宗自曾大父臨邑公而下世受書業儒卽儒弗就

率斤斤脩志意尚名檢節廉自好有清白吏子孫之風焉乃瘞身忍性非其力不食非其有不取敦倫扶義以質行始終不爲約則挹損豐則粲毗我叔父石洲公允卓然足述云叔諱憲成字克守別號石洲知臨邑公縉之孫儒官公朝用之子也儒官公四子伯憲文仲先贈公憲武次叔次憲康大毋趙蚤歿伯敖盪廢產亡走繼大毋徐厭諸子口累遣使出分先公寔收叔拊之叔稍長受書而家日落先公泣謂叔吾汝生計蹙矣不蚤自力一旦耕與讀俱困奚恃而相保乃脫身讀書南山之精舍而屬叔使視產叔用是

廢業而力農胼胝田間或終日不再食獨計所以餉先公者間從先妣韓淑人所受橐餽負而走三十里外致之日一往返以爲常壯受室郭外氏憐其貧時有饋遺謝不受曰吾兄義不受韓門裝吾乃待婦家而炊耶愧吾兄矣已內兄聚菴公舉進士拜壽光令嘗迎叔於官至見其齋厨蕭然比歸一緡尺帛無所受贈曰物以我傷丈廉也聚菴公旣擢侍御里居里富人得過縣尹夜懷金及屋券浼叔居間叔峻却不聽他日過酒肆拾遺橐金復守以候失者還之於是聚菴公聞而嘆曰王氏其興乎世有令德而又培之

厥祚必昌天之道也是時先公已廩於學宮而叔益困於耕先公數割其廩以佐叔俾行小賈而某兄弟復皆占博士籍有進叔自是齋用漸克無何某與璧相繼叨科名孫輩且蒸蒸起歲時家慶迺前為壽叔素不勝酒至是特喜而酌曰吾不意吾子姓有今日也丙戌某獲徼上恩馳贈先大父先父皆如某官先大母先母皆淑人叔又喜曰吾不意吾父兄有今日也叔天性孝友某兒時每見叔上食大父率精潔稱大父意大父晚而喪明不辨杯案叔嘗手匕筋餽之且餽且祝哽必加餐乃已嚴事先公過於大父燕見

必肅容色而後入不命之坐不敢坐先公或朝出暮還則秉燭以待先公未寢不敢寢也戊午先公病瘧垂殆叔披髮引酒自灌其首而祝天願以身代頃忽有異人至門授禁方療之病良已人以爲虔禱之應焉待弟友愛備至即小不遜寧濡忍不肯遂成其過老益輯睦與鄉人處務率以禮讓每朔望為會少長咸秩輒舉德義事訓敕之諸跖弛不檢者咸廩廩受約唯謹學宮圯邑令勸民出貲助費民莫應叔首輸金若干助之工舉令嘉其誼延賓鄉飲一往不再出已奉恩詔拜高年爵冠服歲不過一再御常葛巾野

服扶杖之田遇騎者於道輒自引避不欲煩人以降
接也長厚如此元配郭氏太學生冕女母王夫人兄
民望次民敬卽侍御公次民信南召學博也母少慧
精女紅兼通書史自名閼歸貧家人懼弗堪母恬然
安之若素性雅不喜飾又以貧故斥簪珥盡居常縞
綦操作不施朱粉出門不以帷車而容服舉止娟靚
有儀見者敬焉其在室慎密寡言笑咳聲不踰閨履
聲不下堂刀俎之聲不越庖次而獨於舅姑孝妯娌
和不難委曲以中其懽尤好先淑人卽歿且十餘年
念之尚簌簌淚下鞠諸子慈而不爲姑息方璧六歲

時先公課之急啼而奔寢門母閉弗納則自歸而受
笞也乃不及見其成痛哉繼配戎氏處士堂女郭母
沉靜戎母伉爽賦質若殊其於以拮据佐勒撐約佐
儉均之懋內德焉至拊愛諸子响濡有恩又抱哺諸
子之子而視其立若戎母者歸見郭母於地下無忤
色矣叔生正德戊寅正月二十日卒萬曆己丑十二
月廿二日享年七十有二郭母生正德庚辰八月廿
二日卒嘉靖丁巳十二月晦日年三十有八戎母生
嘉靖癸未三月三日卒萬曆乙未八月二日年七十
有三子男三長家翰廩生娶李氏處士萬女繼侯氏

處士天相女次增廣生家藩與妻加氏先卒家壁已
卯舉人娶米氏督郵萬倉女俱郭母出孫男四人翰
所出者淳初淳初長娶馬氏應州貢士綸女次未娶
壁所出者滙初濯初金庠生長娶周氏戶侯時盛女
次娶成氏舉人以蒙女孫女六一適米擇可一適郭
炳然餘幼金翰出曾孫男二泰紀泰衡曾孫女三翰
等將以十一月既望舉合窆之禮而謀誌銘於某嗟
乎某髫年而先淑人見背寔以身託郭母郭母所以
擁衛之甚周恩猶吾母也其後先公見背則以家託
叔父叔父所以綱紀之又甚周恩猶吾父也乃郭母

歿時某方困於諸生叔父之歿也某適羈於官下皆
不克襄其塋事以報一日之恩於今戎母歿耐塋有
日幸獲執紼而誌銘猶未備也某安忍其汨沒無聞
哉是用揮涕而誌之系之銘曰伯奇孝矣履霜則疏
不如叔也竭力蓄畬於陵廉矣避蓋則矯不如叔也
鴿原相保樂羊懷金入愧其妻孰與歸橐刑于縞綦
孺仲擁絮俯慙兒子孰與趨庭彬彬詩禮愿不徇俗
狷不離倫含醇履素率性之真比古逸民作鄉三老
善積而昌允惟天道南山之麓高鎮之岡有封若斧
伉儷偕藏我銘其幽以俟鴻筆載美穹碑永輝泉室

復宿山房集卷之二十八終



